

Sabiduria den nos alegria

Scirbi pa Ruthy "Lady Ruth" Vrieswijk-Bergen



UN felis dia y un bon siman nobo, colma di salud, paz, pasenshi, y sabiduria den nos alegria!

Danki na tur cu a comenta positivamente riba nos titular nobo, cu nos a introduci algun siman pasa. (Spera cu bo no a spanta di Ruthy su explosion natural den CMB recientemente).

Danki pa gusta nos titular nobo. Pasobra nos tur tin "Sabiduria den nos alegria"

Y ki dushi tabata nos dushi alegria comparti diabierna 2 siman pasa durante "Djispie's Happy Hour" den un super dushi ambiente. (Nos lo purba di bay mas regularmente atrobe pa pasa dushi).

Despues di un pauze bastante largo cu otro prioridadnan, mi casa cu mi a bishita Djispie's Place diabierna 2 siman pasa y a pasa dushi, manera cu nos no tabata ausente at all.

Nos a los e pianan y e heupnan un crenchi riba e dushi melodianan y ritmo romantico di algun bolero y tambe riba ritmo canto y melodia di algun cantica mas movibel cu tambe ta bon pa salud.

Berdad e ta un actividad na unda hopi 50 plussers, 60 plussers y hasta 70 plussers ta participa. Ta subi e pista di baile cu animo smak y alegria solo of cu pareha.

Bo ta wak e cabeynan blanco sinishi ta lombra mey-mey den e publico presente, sinta teniendo cuenta tog cu e "social distancing".

Caminda nos tabata sinta, por a hasta hole e holor fuerte di un dushi puiro cu nos grandinan ta usa riba nan curpa pa fresca y hole dushi. E sorpresa e anochi aki a bin, ora cu Wim Steenhuis, un caballero Hulandes cu su curazon Arubiano a bay para dilanti un shon grandi den rolstoel bisti cu petchi y Wim a canta e cantica "Ik heb eerbied voor jouw grijze haren".

Un bunita dedicacion n'e querido tata di Corma VroegInDeWei, e bunita pareha di e cantante motor di e banda musical Etty Toppenberg, un di e mihor artistanan di tur tempo.

"Wim Steenhuis, je was fantastisch! Wat heb je mooi gezongen met je diepe warme mooie stem." Sigur un momento emocional y special di e anochi aki e biaha aki na Djispie's. Nan sa tin mas cantante, entre otro, Victor Samuel. Ta nos tur tin den nos e sabiduria den nos alegria. Bo ta canta pasa pret, pasa bon, baha stress. Bo ta canta y alegre e curazonnan rond di bo. Ki dushi e cancionnan tur a zona, canta cu hopi energia y alegria.

Hasta e cantica: "Boneiro tin, yuwana grandi, yuwana grandi...manera cayman" sigi su tras cu "Aruba tin, caymannan grandi, caymannan grandi.. na boc'i rieu" (na boca di riu). Nan cantica di sehu, y Jerusalem y mas cu a pone nos sinti nos mes bek na cas mesora. Ta manera tempo no a pasa. Dushi pa a topa cu cara y curazonnan conoci manera Roy Maduro di Fantastic Gardens y Elliott y Martha Jackson y varios mas, cu ta fiel participantenan di Djispie's Happy Hour tur diabierna cuminsando na bahada di solo y termina awor den tempo di Covid-19 un crenchi mas tempran cu antes. Y.....na Djispie's nos a bin haña atrobe e dushi cerbes Chill di mango.

Ki dushi tabata e bendicion di dushi awasero den fin di siman pasa cu ta tra'i lomba, ki contento nos dushi Mama Tera su bunita naturaleza ta. Shonnan, sigi sembra bon simianan di amor, pordon, alegria, sabiduria y Amistad. Bida ta un regalo tur dia di nobo ora bo lanta cu bo rosea y salud.

Pabien na Etty Toppenberg y su grupo musical di tur diabierna na Djispie's Place. Pabien Wim Steenhuis pa a canta e bunita cantica "Mi tin reverencia pa bo cabeinan blanco" pasobra ta hopi tin cabein blanco presente fielmente na Djispie's. Love you too !